

ՔԱՂԱՔԱԿԱՆ ՏԵՍՈՒԹԻՒՆ

Մտնելով նոր տարւայ շէմքը, Եւրոպան ոչ մի կերպ չի կարող պարծենալ, թէ վճռած լինի մնացած տարիներից ժառանգած որ և է միջազգային քաղաքական ծանր խրդիր, և մոռում լինի նոր տարին՝ պայծառ յոյսերով: Քաղաքական մթնոլորդը չափազանց ծանր է. քաղաքականի հետ միասին այս անգամ մանաւանդ բարոյական կեանքն է որ մթնադնել է երկինքը: Ֆրանսիայում յանկարծ երևան եկաւ Պանամայի խնդիրը, որը այնքան խոշոր է, որ երկրորդական դարձրեց ամեն այլ քաղաքական խնդիր: Պանամայի սկանդալը, որի բացառիկ խոշորութիւնը հարկ դրեց «Մուրճ»-ի վերայ իւր ընթերցողներին չընթացիկս պահել գործի բոլոր մանրամասնութիւններին, այդ սկանդալը, ասում ենք, բարոյական սկանդալ է, որը բնորոշում է ոչ այնքան Ֆրանսիայի կառավարչութեան ձևը, ոչ թէ հանրապետութիւնը, այլ ժամանակակից բարձր հասարակութիւնը առհասարակ, եւ զարմանալի երեւոյթ. նոյն այն ժամանակ, երբ ամբողջ Ֆրանսիան կլանւած էր Պանամայի դեռ ևս այժմ էլ չը վերջացած խնդրով, Խաալիայում սկսեցին նման մերկացումներ՝ կաշառակերութեան և հասարակաց վարկի հարստահարութեան, որի մէջ խառն են բանկերի կառավարիչներ, պարլամէնտի անդամներ և կառավարչական մարդիկ:

Նման գործ սպառնաց նաև Գերմանիային, ուր սոցիալիստական Vorwärts լրագիրը, ապա և ուրիշ թերթեր բացարին զաղտնիքներ «Վելթեան ֆոնդ» կոչւած մեծաքանակ գումարների մասին, որոնցից պէտք է օգտւած լինեն, թէև դեռ չը չափնւած, բայց իբր հասարակութեան և կառավարութեան մէջ բարձր դիրք ունեցող հարիւրաւոր անձեր:

Այն թանձր քօղը, որ կատարւած մերկացումները սփռեցին Եւրոպայի առաջնակարգ և լուսաւորւած երկիրների բարձր հասա-

րակութեան վերայ, այնքան ծանր ներգործութիւն արաւ ամբողջ աշխարհքի վերայ, որ քաղաքականութիւնը մի առժամանակ սոխալաւած պէտք է լուէր: Բայց Ֆրանսիայում Պանամայի սկանդալը յարուցեց նաև քաղաքական խնդիրներ, որովհետև կուսակցութիւնների բարոյականութիւնը միշտ մեծ դեր է կատարել այդ երկրի կառավարչական սիստեմների վերայ: Պարզ է որ Ֆրանսիայում իսկոյն նորից արթնացան միապետականների յոյսերը՝ հանրապետականների խաչառակութեան վերայ կանգնեցնել իրանց դրօշակները: Պարլամէնտական ընտրութիւնների ժամանակը մօտ լինելով՝ բնական է թէ որքան ոյժ պիտի ստանայ հին կռիւը հանրապետականների և միապետականների մէջ:

Հանրապետական կուսակցութիւնը առայժմ պէտք է թուլանայ նրանով, որ գործի մէջ խառը պատգամաւորները այլ ևս չը պիտի կարողանան վերընտրւել. կ'ընտրի ազգը նոցա տեղը միապետականներին թէ ոչ և կասկածի տակ կը զցի աճողջ հանրապետական կուսակցութիւնը թէ ոչ, — ահա խնդիրը:

Բայց դա մի խնդիր է միայն միապետականների համար. որովհետև Ֆրանսիական գործերին հետամուտ մարդը չի կարող լրջօրէն խնդիր դնել հանրապետութեան գոյութեան և չը գոյութեան մասին: Պանամայի գործը թէի շատ ծանր գործ է, բայց նա միայնակ բաւական չէ հանրապետութիւնը տապալելու համար: Դա մի գործ է, որ պատիւ չի բերում Ֆրանսիային և Յերոպային առհասարակ, բայց դա մի գործ չէ, որ կարող լինէր պատահել միմիայն հանրապետութեան շնորհիւ: Խալիայի օրինակը — ահա մի շօշափելի ապացոյց:

Պանամայի գործը, որ տազնապի մէջ է պահում Ֆրանսիային, տազնապ զցեց նա և կառավարութեան մէջ: Լուբէ ՚ի մինիստրութեան, որի մէջ նաև Լուբէն, Ֆրէյսինէն, Ռուլինէն բայց Ռիբօի մինիստրութիւնը ինքը, առանց արտաքին ճնշման, վերափոխեց այնպէս, որ Լուբէն, Ռուլինէն և Ֆրէյսինէն հեռացան տեղտալով նոր մարդկանց: Ռիբօի վերայ ներկայումս ծանրացած է մի վերին աստիճանի պատուաւոր և պատասխանատու պաշտօն, հանրապետութիւնը պաշտպանել ներքին թշնամիներից և պատարասուել մօտագայ ընդհանուր ընտրութիւնները պարլամէնտի համար:

Ներկայումս Ֆրանսիական մինիստրութեան մէջ են՝ Ռիբօ, մինիստր նախագահ և ներքին գործերի մինիստր (առաջ նա էր արտաքին գործերի մինիստր)։ Դէռել արտաքին գործերի, զենեւալ և ռազմիկի մասին պատերազմական մինիստր, Բուրժուա՝ հանրական կրթութեան և այլն։

Ֆրէյսինէի հեռանալը կարեւորագոյն փոփոխութիւնն է այդ բոլորի մէջ, և ամենից ցաւալին։

Կարեւոր փոփոխութիւն կատարեց նաև երեսփոխանական ժողովում, ուր ներկայ հանրապետութեան կարեւորագոյն անձերից մէկը, Շարլ Ֆլոքէն, հեռացաւ ժողովի նախագահի պաշտօնից, որ պաշտօնում ընտրեց նոյնպէս կարեւոր պետական անձ՝ Կազիմիր Պերիէ։

Անգհանուր քաղաքական դրութիւնը, որ ինչ վերաբերում է պետութիւնների քաղաքական համախմբումներին, ոչ մի կերպ չի փոխփոխել։ Առաջւայ պէս եռապետական դաշնակցութեան դիմաց՝ կանգնած է Ռուսիայի և Ֆրանսիայի բարեկամութիւնը, որը Պանամայի գործի աղմուկով չը վնասեց։ Դորա փորձը տրեց Եգիպտոսում կատարւած նոր եղելութիւնների առիթով։ Եգիպտոսի նոր խեղիւր՝ Աբբաս փաշա, ուզեց անգլիացիների ճնշումից ազատուել, մի մինիստրութիւն կազմելով իւր բացարձակ իրաւունքով։ Բայց քսանուչորս ժամայ ընթացքում հարկադրեց յիտս կոչել իւր որոշումը և նոր մինիստրութիւն կազմակերպել՝ աւելի համապատասխան Անգլիայի հայեացքներին։ Բայց այդ գործում Անգլիան միայն ձևականապէս գործը տարաւ, որովհետև նոր մինիստրութիւնը այնուամենայնիւ ըստ ամենայնի չի վայելում Անգլիայի վստահութիւնը։ Միւս կողմից Եգիպտոսում սկսեցին աղմկալի ցոյցեր անգլիացիների դէմ, ցոյցեր, որոնք հարկ դրեցին Անգլիայի վերայ զօրեղացնել իւր զօրքը Եգիպտոսում։ Առ այժմ գործը աւելի հեռուն չի գնացած, բայց բնորոշ է որ այդ առիթով յամառ կերպով պահպանուում է այն լուրը, իբր Թիւրքիայի, Ռուսիայի և Ֆրանսիայի միջև բանակցութիւն է եղած՝ Եգիպտոսի գործերի համար միջազգային կոնֆերենցիա հրաւիրելու մտքով։

Լորդ Ռոզբլըին շտապեց հաւատեացնելու, որ Անգլիան որ և է փոփոխութիւն Յգիպտոսում առաջացնել մտադիր չէ:

Բուլղարիայում առաջին մինիստր Ստամբուլով պատրաստում է երկրի սահմանադրութեան վերաքննութեան գործը, որով իմիջի ալլոց պէտք է թոյլ տրւի գահաժառանգներին ոչ ուղղափառ կրօնի դաւանութիւնը: Դորա դէմ բողոք յարուցեց սուլթանին բուլղարական էկզարխը. սուլթանը, սակայն, առարկել է որ դա՛ներքին բուլղարական խնդիր է, հետեւապէս կուսակիցների որ և է կողմը պահելու մտադիր չէ: Հաստատ կարելի է ասել, որ Բուլղարիան յուզող այդ նոր խնդիրը այնպէս էլ կը մնայ ներքին խնդիր և տեղիք չը պիտի տայ որ և է միջամտութեան ում և է կողմից:

Շ.

Այս տողերը գրելուց յետոյ հեռագիրը բերաւ մի նշանաւոր լուր: Փետրւարի 2-ին Գլադստոնը ներկայացրեց համայնքների ժողովին օրինագիծը իրլանդական ինքնավարութեան համար: Բիլլի նպատակն է՝ օրէնք սահմանել յասկապէս իրլանդական գործերի համար: Իրլանդիան պէտք է ունենայ իւր պարլամէնտը, բաժանւած՝ վերին և ստորին ժողովների. վերինը կ'ունենայ 48 անդամ, ստորինը՝ 103. վերին ժողովի անդամները ընտրւում են 8 տարով, ստորինը—5 տարով: Փոխարքան նշանակւում է 6 տարով: Ստեղծւում է Իրլանդիայի գաղտնի խորհուրդը իբր կատարողական մի մարմին, որը իրօք կը լինի փոխարքայի խորհուրդը: Վեստմինստէրում (անգլիական պարլամէնտ) իրլանդացիք՝ կ'ունենան 81 պատգամաւոր, որոնք ձայն չեն ունենալ զուտ անգլիական խնդիրների քննութեան ժամանակ: Իրլանդիայի ներկայ ոստիկանութիւնը կամաց-կամաց պէտք է վերացնուի և փոխարինւի իրլանդական կառավարութեան ոստիկանութիւնով: Ընդհանուր պետական ծախքերում Իրլանդիան կը մասնակցի արդարութեան հիմունքների վրայ: Գլադստոնի ճառը տւեց 2 ժամ, և վերջացաւ այս խօսքերով թէ՛ ներկայ օրէնքը կը զօրացնի պետութեան փառքը, զօրութիւնը և միութիւնը:

Շ.